

АКАФИСТ СВЯТОМУ ПРАВЕДНОМУ ФЕОДОСИЮ, КАВКАЗСКОМУ ЧУДОТВОРЦУ

Кондак 1

Избранный угодниче Христов и преславный чудотворче, преподобне отче Феодосие, подвиги твоими Ангелы удививый и человеки многия из глубины греховныя изведый, умоли и о нас прославльшаго тя Господа, и от бед и напастей нас свободи, любовию зовущих ти: Радуйся, преподобне Феодосие, Кавказский чудотворче.

Икос 1

Ангелов Творец избра тя от чрева матери твоея и рождестве твоём показа знамение будущаго монашеского жития твоего, да, будеши, богоблаженне Феодосие, молитвенником ко Господу и Пречистой его Матери за весь мир. Мы же грешники, уповающе на скорую помощь твою, взываем ти сице: Радуйся, от чрева матери Господом избранный; Радуйся, еще в детстве к служению Богу преднареченный. Радуйся, в рождестве твоём чудное знамение монашеского жития явивый; Радуйся, в юности строгость монашеского жития показавый. Радуйся, Христа всем сердцем возлюбивый; Радуйся, ум и сердце Господу предавший. Радуйся, народа российского молитвенное ограждение; Радуйся, земли кавказския священное украшение. Радуйся, преподобне Феодосие, Кавказский чудотворче.

Кондак 2

Видя Господь благое сердца твоего изволение, яко от младенчества имел еси велию любовь к Нему и немолчно прославлял еси Имя Господне, уготова ти ангельское житие во Святей горе Афонстей. Там же во смирении и послушании пребывал еси, научая нас Единаго Бога любить и Того ради вся земная презирати, вопиюще Ему: Аллилуия.

Икос 2

Разум имея Богом просвещенный, преподобне отче Феодосие, на Раевом камне от младенчества молитися Богу навывк еси, веру крепкую, надежду несомненную, любовь истинную к Нему стяжал еси, и стопы своя ко Святей горе Афонстей направивый, тем же ублажаем тя сице: Радуйся, от младенчества молитву ко Господу устами творивый; Радуйся, с ранних лет любовию пламенной к Нему возгоревый. Радуйся, на Святой горе Афонстей во отрочестве ангельски поживый; Радуйся, там многие послушания понесый. Радуйся, усердный к Богу и Матери Божией молитвенниче; Радуйся, истинного покаяния проповедниче.

Радуйся, скорбящим скорое утешение и вразумление; Радуйся, присное и не-ложное их успокоение. Радуйся, преподобне Феодосие, Кавказский чудотворче.

Кондак 3

Силу, данную ти свыше, принял еси, преподобне отче Феодосие, изгоняти всякую силу вражию. И того ради с кротостью и смирением уврачевал еси одержимую бесом жену знатную, да сие чудо видяще, вси людие прославиша Бога, вопиюще Ему: Аллилуиа.

Икос 3

Имуще тя, изрядный угодниче Христов Феодосие, воителя противу силы бесовския, теплаго молитвенника и предстателя пред Господом о нас, недостойных, любовию твоею побеждаеми, со умилением зовем ти: Радуйся, во юности Духа Святаго от Господа получивый; Радуйся, жену знатную, бесом одержимую, будучи отроком, исцеливый. Радуйся, воине Христов добропобедный; Радуйся, предстателю о нас к Богу и Богородице непостыдный. Радуйся, силу чудес от Бога явивый; Радуйся, плотския похоти умертвивый. Радуйся, Небесного Царя избранниче предивный; Радуйся, козни диавольския победивый. Радуйся, преподобне Феодосие, Кавказский чудотворче.

Кондак 4

Бурю гнева неправеднаго зависти ради от братии претерпел еси, блаженно Феодосие, ими в нечистоты вверженный, Пречистой же Богородицей чудесно извлеченный. Сего ради, зряще о тебе таковое Матери Божией благоволение, вопием Всевышнему Богу: Аллилуиа.

Икос 4

Слышаша вси людие о чудеснем излиянии милости Пресвятыя Девы Марии и Архистратига Божия Михаила на тебе бывшая, мы грешнии прославляем дивнаго во святых своих Господа и Его Пречистую Матерь со Архангелом и вопием ти: Радуйся, Царицею Небесною от смерти спасенный; Радуйся, Архистратигом Михаилом от посрамления избавленный. Радуйся, тесный путь спасения возлюбивый; Радуйся, ярем Господень на выю свою возложивый; Радуйся, от братии в монастыре всяческие поношения претерпевый; Радуйся, младенческое незлобие имевый. Радуйся, рабе Господень благий и верный; Радуйся, скорый помощниче всем скорбящим и обремененным. Радуйся, преподобне Феодосие, Кавказский чудотворче.

Кондак 5

Божественный огонь благодатный видя на Гробе Господнем в Великую Субботу чудесно возгораемый, и сим огнем освященный, многие годы послу-

жил еси, преподобне отче Феодосие, во Святей Земле, выну взывая Богу: Аллилуиа.

Икос 5

Видя тя очами веры чада твоя, преподобне отче Феодосие, со благоговением у Гроба Господня служаща и со дерзновением Ему мольбы о стране Российстей приносяща, удивлением объята, благодарно вопием ти: Радуйся, в Земле Святей благодатно поживый; Радуйся, по стопам Спасителя ходивый. Радуйся, Огонь благодатный зревый; Радуйся, пламень любви к Богу имевый. Радуйся, пред Гробом Господним служителю предивный; Радуйся, молитвенниче к Богу и Богородице о нас неусыпный. Радуйся, веру Христову миру являяй; Радуйся, всюду Христа прославляяй. Радуйся, преподобне Феодосие, Кавказский чудотворче.

Кондак 6

Проповедник смирения и покаяния был еси, отче, примером жития твоего незлобие и всепрощение показуя, якоже светило многосветлое тьму неведения и уныния от приходящих к тебе отгонял и всех увещевал плоть духови покоряти и чистым сердцем пети Богу: Аллилуиа.

Икос 6

Приемый от Господа благодать разума о Святой Троице на Афонстей горе, во Иерусалиме и Царьграде, в России Православныя веры проповедник явился еси. Мы же, верующе православно во Святую Троицу, с любовью вопием ти: Радуйся, веры Православныя среди неверных проповедниче; Радуйся, предивный Божий избранниче. Радуйся, усердно призывающим тя помогай; Радуйся, доброе стадо свое наставляяй. Радуйся, людей земли кавказския усердный заступниче; Радуйся, к Богу и Богородице непрестанный о них молитвенниче. Радуйся, Царствия Небеснаго наследниче; Радуйся, веры Христовой дерзновенный исповедниче. Радуйся, преподобне Феодосие, Кавказский чудотворче.

Кондак 7

Хотя Человеколюбец Господь явити в тебе, преподобне, свое неизреченное к людям милосердие, показа тя яко воистину светило Богосветлое: скорым твоим ходатайством чудеса многая и преславная совершаются. Ты же, старче, и при жизни достиг посещения небесных служителей, благодарне прославляя Всевышняго Бога: Аллилуиа.

Икос 7

Новаго видяще тя избранника Божия в земле Кавказской, издавеча притекаху к тебе вернии в скорбех и болезнях, егда источник в пустыне ископал еси, старче Феодосие, и благодать на воду сию у Святой Троицы испросил еси исце-

ляти телесныя и душевныя недуги. Сего ради взываем ти: Радуйся, Старче, рабе Господень; Радуйся, яко из уст твоих вернии благодатно напоятся. Радуйся, духовною пищей алчущия питай; Радуйся, святою водой из источника твоего верным жажду утоляй. Радуйся, яко при жизни посещения Царицы Небесныя сподобивыйся; Радуйся, и святыми небожителями неоставленный. Радуйся, яко благословением и советами людям верующим помогай; Радуйся, всех с верою к тебе притекающих на путь спасения наставляя. Радуйся, преподобне Феодосие, Кавказский чудотворче.

Кондак 8

Странное и преславное чудо даровал ти Господь, преподобне отче Феодосие, дар молитвенный, живых заступающий и от ада спасающий. Мы же Господу Нашему, даровавшему нам такового молитвенника и ходатая о нас, вопием: Аллилуиа.

Икос 8

Всего себя Христу от чрева матерняго предал еси блаженне Феодосие, умиленным сердцем и сокрушенною душею Тому всегда предстоя и духовная чада твоя научая хранити смирение и само-укорение, дар умиления стяжати. Сия слышавше, восхваляем тя сице: Радуйся, Бескровной Жертвы достойный совершителю; Радуйся, Алтаря Господня благоговейный служителю. Радуйся, светильниче духовных дарований; Радуйся, обитель иноческую на земле Кавказской основавый. Радуйся, тяжкие заточения Христа ради претерпевший; Радуйся, об изгнании своим ближним предсказавый. Радуйся, любящим и чтущим тя ходатаю спасения. Радуйся, приводяй грешников ко исправлению. Радуйся, преподобне Феодосие, Кавказский чудотворче.

Кондак 9

Вси людие удивляхуся тебе, старче Феодосие, яко призыванием Господа и имени твоего бесы изгоняются и одержимые исцеляются. Тако и мы, люди края Ставропольского, прибегая к тебе, умиленно возглашаем Богу: Аллилуиа.

Икос 9

Разум человеческий не может изрещи обилие благодати духовныя, ею же ты, отче Феодосие, преисполнен. Юже и мы получаем, в молитве к тебе обращаясь. Сего ради сицевое пение приносим тебе: Радуйся, молитвами твоими тьму напастей от нас отгоняеши; Радуйся, на узкий путь отрешения от мира нас наставляеши. Радуйся, страданиями душу обогативый; Радуйся, утешение чадам духовным явивый. Радуйся, Господом укрепленный; Радуйся, Духом Святым просвещенный. Радуйся, среди горских народов поживый; Радуйся, и с иноверными в мире жити учивый. Радуйся, преподобне Феодосие, Кавказский чудотворче.

Кондак 10

Богоборная гонения Церкви Православной видя, ты, отче Феодосие, желая помочь в трудную годину верным спастися, подвиг юродства приял еси, да явиши людем премудрости Божией велия дары, вопиюще Ему: Аллилуиа.

Икос 10

Стена еси и твердое прибежище нам, на Кавказе живущим и к заступлению твоему прибегающим, чудотворче Феодосие. Тем же в бедах, скорбех, обстоятельствах и лишениях многих пребывающе, радуйся, твоему о нас заступлению, благодарне вопием ти: Радуйся, в юродстве своем силу Божию людем православным явивый; Радуйся, грядущая, яко настоящая, провидевый. Радуйся, прегрешений сокровенных обличителю прозорливый; Радуйся, жителям града Минводы беды и несчастья в притчах предсказавый. Радуйся, детей малых от огненного запаления чудесно избавивый; Радуйся, призывающим тя скорый помощниче. Радуйся, любви и смирению свою паству научая; Радуйся, от мысли о самоубийстве упавших духом отвращая. Радуйся, преподобне Феодосие, Кавказский чудотворче.

Кондак 11

Пение всеумиленное Пресвятей Троице принесл еси, егда душу свою Спасителю Мира в руке предал и с лики Ангел в Небесныя селения вселился еси, воспевая Богу: Аллилуиа.

Икос 11

Видевшие людие, угодниче Божий Феодосие, мирную кончину твою и чудеса на гробе своем творимые, возрадовашася. Темже в уповании всесильнаго предстательства твоего у Престола Пресвятыя Троицы уверишася, с любовью взывают ти: Радуйся, в обители небесныя всели-выйся; Радуйся, кончину твою колокольный звон чудесно возвестивый. Радуйся, гроб твой Ангелами сопровождаемый; Радуйся, на могиле твоей столп огненный многими виденный; Радуйся, яко от мощей твоих верные получают исцеления. Радуйся, притекающих к гробу твоему крепкое заступление. Радуйся, таин Божиих вечный зрителью. Радуйся, от бед и горя скорый избавителю. Радуйся, преподобне Феодосие, Кавказский чудотворче.

Кондак 12

Благодать Божию приял еси, преславне Феодосие яко при жизни твоей светильник был еси приходящим к тебе с верою, и по смерти своей возсиял еси светом чудес твоих. Да живущие на земле Кавказской, дивляхуся о славе твоей, взывают Богу со умилением: Аллилуиа.

Икос 12

Поюще Бога, дивнаго во Святых Своих, восхваляем тя, преподобне отче Феодосие, был бо еси образ жития юным, правилом веры мужем, в старости — учитель старцев, нам же всем молитвенник и предстатель. Сего ради вопием ти: Радуйся, долголетием от Бога одаренный; Радуйся, и по смерти чад своих не оставивый. Радуйся, обилие чудес верным явивый; Радуйся, всем с верою приходящим к мощем твоим помогающий. Радуйся, на стезю спасения всех наставляющий; Радуйся, Церковь Святую от неверия и расколов сохраняющий. Радуйся, во бранех верный о нас молитвенниче; Радуйся, архиереев и иереев земли Кавказской покровителю и скорый помощниче. Радуйся, преподобне Феодосие, Кавказский чудотворче.

Кондак 13

О, пречудный угодниче Божий и чудотворче, преподобне отче Феодосие! Ты воистину Дар Божий еси нам, иже во иночестве, и во священстве, и во юродстве Триипостаснаго Бога прославил еси. Приими малое сие моление наше и умоли Господа Бога, да помилует нас твоими мольбами и на путь покаяния всех наставит, вопиющих Ему: Аллилуиа, аллилуиа, аллилуиа.

(Этот кондак читается трижды, затем икос 1 и кондак 1)